

四庫全書

史部

欽定四庫全書

欽定歷代職官表卷五十五

各省駐防將軍等官表

駐防將軍	
	三代
	秦漢
	後漢
	三國
	晉
	宋齊
	梁陳
	北魏
	北齊
	後周
	隋
	唐
	季宋
	遼
	金
	元
	明

[illegible]

欽定四庫全書

卷五十五

陸

百戶

駢騎校

各省駐防將軍等官

國朝官制

直隸

保定府城守尉一人防禦四人驍騎校四人

滄州城守尉一人防禦四人驍騎校四人

寶坻縣防守尉一人防禦二人驍騎校一人

東安縣防守尉一人防禦二人驍騎校一人

采育防守尉一人防禦二人驍騎校一人

霸州防守尉一人防禦二人驍騎校一人

固安縣防守尉一人防禦二人驍騎校一人

雄縣防守尉一人防禦二人驍騎校一人

良鄉縣防守尉一人防禦二人驍騎校一人

謹案以上俱稽察九處駐防旗務大臣所屬故

列於熱河密雲山海關三處副都統之前

熱河副都統一人協領兼佐領五人佐領十五人防禦

二十人驍騎校二十人

密雲縣副都統一人協領四人佐領十六人防禦十六人驍騎校十六人分駐古北口防守尉一人防禦二人驍騎校四人昌平州防守尉一人防禦二人驍騎校一人

山海關副都統一人協領兼佐領二人佐領六人防禦八人驍騎校八人分駐喜峯口防守尉一人防禦二人驍騎校四人冷口防守尉一人防禦二人驍騎校三人玉田縣防守尉一人防禦二人驍騎校二人三河縣防

守尉一人防禦二人驍騎校二人順義縣防守尉一人
防禦二人驍騎校一人永平府防守尉一人防禦二人
驍騎校二人羅文峪防禦一人驍騎校二人

謹案以上三處副都統皆自率所屬專鎮一方
別無將軍都統以節制之其張家口都統惟轄
察哈爾八旗別見各處辦事大臣表中茲不復
載

陝西

西安將軍一人副都統二人協領兼佐領八人佐領三十二人防禦四十人驍騎校四十人

甘肅

寧夏將軍一人副都統一人協領兼佐領五人佐領十九人防禦二十四人步營防禦二人驍騎校二十四人涼州副都統一人協領兼佐領二人佐領六人防禦八人驍騎校八人莊浪城守尉一人佐領四人防禦四人驍騎校四人

謹案各省副都統皆統於將軍惟涼州副都統
不屬寧夏將軍節制

江蘇

江寧將軍一人副都統一人協領兼佐領八人佐領三
十二人防禦四十人驍騎校四十人分駐京口副都統
一人協領兼佐領二人佐領十四人防禦十六人驍騎
校十六人

浙江

杭州將軍一人副都統一人協領兼佐領九人佐領二十三人防禦二十人驍騎校三十二人分駐乍浦副都統一人協領兼佐領五人佐領十一人防禦八人驍騎校十六人

湖北

荊州將軍一人副都統一人協領兼佐領十人佐領四十六人防禦五十六人驍騎校五十六人

廣東

欽定四庫全書

卷五十五

卷五十五

廣州將軍一人副都統二人協領兼佐領八人佐領八人防禦三十二人驍騎校三十二人水師營協領一人佐領二人防禦二人驍騎校六人

福建

福州將軍一人副都統一人協領兼佐領八人佐領八人防禦八人驍騎校十六人水師營協領一人佐領二人防禦二人驍騎校六人

四川

成都將軍一人副都統一人協領兼佐領五人佐領十
九人防禦二十四人驍騎校二十四人

山東

青州副都統一人協領兼佐領四人佐領十二人防禦
十六人驍騎校十六人兼轄分駐德州城守尉一人防
禦四人驍騎校四人

謹案山東駐防未設將軍惟以副都統管領與
熱河密雲山海關諸處同例

山西

太原城守尉一人防禦四人驍騎校四人

謹案山西城守尉乾隆二十五年定歸巡撫節制

河南

河南城守尉一人佐領十人防禦十人驍騎校十人

謹案河南城守尉乾隆二十五年亦定歸巡撫

節制

歷代建置

謹案戍防險要三代已然然因事而行及期而代特以為征調之役不以為設官之制也秦漢以後兵制遞更或隨時以制宜或應機而馭變經畫措置靡所不周而求如

國朝駐防之法者則史籍所傳未之前睹夫綠旗之兵名為統於標營實則散在塘汛每猝不易集有勁旅為之坐鎮而後遇有調發乃可以振

策即行綠營之兵騎射不能盡嫻戰鬪亦不能盡勇多相沿積習有八旗為之矜式而後耳濡目染乃可以相觀漸化

祖宗定鼎之初必以羽林七萃棊布星羅於天下用意至為深遠且即三代盛時出車還率雨雪楊柳有道途之感瓜苦栗薪有家室之情故征調可暫不可常惟駐防之制挈孥以往世其廩祿則居處安而人心固又主客異形山川殊勢地非

素習未習長驅惟駐防之制世居是土明其道
路之夷險識其攻守之緩急則遇事駕輕就熟
雖戍兵而無異土人蓋一舉而數善備焉此誠
非自古以來籌兵者之所意及故博稽史籍亦
無舊典之可徵然蕭統有言椎輪為大輅之始
層冰為積水所成古來用武之朝善謀之將亦
有窺見此意之一二者謹摭其近似具列於左
用備參考焉

三代未置

謹案周禮夏官曰司險掌九州之圖以周知山林川澤之阻皆有守禁鄭康成註曰國曰固野曰險夏官有掌固掌在國城郭則司險掌畿外阻固也蓋名山大澤不以封凡險與之區皆隸王室有王官以司其禁戒是亦駐防之意然有司之守非軍旅之鎮也又易祓周禮總義曰詩溥彼韓城燕師所完傳以為燕安也言王師久

屯於外皆安集也則周時王國六師固有分屯
調守之事考小雅有遣戍勞還之詩多述其載
離寒暑則當時鄉遂六師不過有事征遣無事
歸耕與駐防之永鎮一方者亦有異今不敢附
會古義強相牽合用以見

國朝兵制之善為三代之所未及也

秦
未置

謹案漢書嚴安列傳稱秦使蒙恬將兵戍於北

河又使尉佗將卒戍越然皆非久駐之師其統兵之官亦未嘗有特設之制也

漢

司馬貞史記索隱孔文祥云邊境有屯兵後因置將屯將軍

謹案章如愚山堂考索曰漢高祖之世南北二軍不出而民兵散在郡國有事以羽檄召材官騎士以備軍旅文帝始以銅虎符代檄當時各

因其地以中都官號將軍將之如魏邀為北地將軍周竈為隴西將軍事已而罷是將軍之因地為名實昉於此然事已而罷則與今駐防將軍迥異至漢書武帝本紀稱元光元年衛尉李廣為驍騎將軍屯雲中其事亦與秦戍北河等惟司馬貞史記索隱所稱將屯將軍以屯駐邊疆特設此制所將雖亦郡國之兵而坐鎮一方與今駐防將軍尚髣髴相似也

後漢

後漢書和帝本紀永元十一年復置右校尉官

李賢

注東觀記曰置在西河鵠澤縣

謹案漢之五校本衛宿禁旅然每遠出屯戍如鄧鴻以將軍長史率五營士屯雁門朱寵以北軍中侯將五營士屯孟津是也班雄以屯騎將五營兵屯長安三輔征西馬賢將左右羽林五校士屯漢陽西河鵠澤亦置右校尉均以禁近

親兵分布於巖疆重地與今駐防將軍之制相近

洪适隸釋張公神碑監黎陽營謁者豫章南昌李丞釋曰漢志註云世祖以幽冀并州兵騎定天下特於黎陽立營以謁者監之

謹案漢官儀中興以幽冀并州兵克定天下故于黎陽立營以謁者監之考光武以幽冀并州兵制勝與唐高祖太原兵同皆所謂自將親兵也謁

者以內臣典天子親兵置營黎陽與今之駐防
各官相近後漢書馬武竇固陳訢以黎陽營兵
破西羌鄧訓以黎陽營兵防烏丸竇憲以黎陽
營兵破匈奴劉尚以黎陽營兵破迷唐度尚以
黎陽營兵救零陵然則黎陽營在後漢當與五
校並重故必以中謁者典之於外重兵重鎮委
任必由禁近也又考玉海載北邊有變則置度
遼官南蠻或叛則置象林兵羌犯三輔則置長

安雍二尉鮮卑入寇則置漁陽營永建元年緣邊增步兵陽嘉元年緣海各屯兵而扶風漢陽三百塢魏郡恒山六百一十六塢凡此皆以重兵分屯但主之者未必皆由內臣也而因事設屯興廢無常與今各省駐防當有間也

三國 未置

晉 未置

謹案晉書溫嶠列傳稱先朝使五校出田令四

軍五校有兵者及護軍所統外可分遣二軍出并屯要害處是亦駐防之意然嶠之所請當時未見舉行時虛有是議而已

宋齊梁陳

未置

北魏

周書鄭偉列傳魏恭帝二年進位大將軍除江陵防主都督十五州諸軍事專戮副防主杞賓王坐除名

謹案北魏六鎮皆在代京之北以屏蔽平城故
都各鎮鎮將實近今

盛京各處駐防副都統之職故不列于此表惟江
陵防主副防主之類則近于今之各省駐防將
軍及副都統矣

北齊

未置

後周

未置

隋

欽定四庫全書

御定歷代通鑑輯覽
卷五十五

隋書文帝本紀開皇十年五月乙未詔曰魏末役車歲動未遑休息權置防府南征北伐居處無定朕甚愍之凡軍人可悉屬州縣墾田籍帳一與民同軍府統領宜依舊式罷山東河南及北方極邊之地新置新府

馬端臨文獻通考隋兵制大約仍周府兵之舊而加潤色諸府之兵有郎將副將防主團主以相統治其外又有驃騎車騎二府皆有將軍後更驃騎

曰鷹揚郎將車騎曰副郎將別置折衝果毅此府兵之大畧也

謹案周初府兵之制然地狹民寡征調頗仍未得盡行其法及隋既平陳始置郎將副將防主團主諸職駐防之制始于是稍詳矣其防主一官為郎將副將之屬與北魏防主名同實異猶宋之巡檢專制諸州今巡檢則為雜流未秩也

唐

新唐書兵志高祖初起開大將軍府發自太原有兵三萬人及諸起義以相屬得兵二十萬武德初始置軍府以驃騎車騎兩將軍府領之析關中為十二道曰萬年道長安道富平道醴泉道同州道華州道寧州道岐州道邠州道西麟州道涇州道宜州道皆置府三年更以萬年道為叅旗軍長安道為鼓旗軍富平道為元戈軍醴泉道為井鉞軍同州道為羽林軍華州道為騎官軍寧州道為揚

威軍岐州道為平道軍邠州道為招搖軍西麟州
道為苑游軍涇州道為天紀軍宜州道為天節軍
軍置將副各一人以督耕戰以車騎府統之六年
廢十二軍改驃騎曰統軍車騎曰副將居歲餘後
十二軍軍置將軍一人軍有防置主一人以檢察
戶口勸課農桑太宗貞觀十年更號統軍為折衝
都尉副將為果毅都尉諸府總曰折衝府凡天下
十道置府六百三十四皆有名號而關內二百六

十有一皆以隸諸衛凡府三等兵千二百人為上
千人為中八百人為下置折衝都尉一人左右果
毅都尉各一人長史兵曹副將各一人校尉六人
士以三百人為團團有校尉五十人為隊隊有正
十人為火火有長

杜牧原十六衛外開折衝果毅府五百七十四上
府不越一千二百人五百七十四府凡有四十萬
人

陸贄奏議太宗列置府兵八百所而關中五百舉
天下不敵關中則居重馭輕之意也

唐會要武德三年七月十一日下詔曰周置六軍每
習蒐狩漢增八校畢選驍勇令伊洛猶蕪江湖尚
梗各因部校序其統屬改換鉦鐸創造徽章取象
天官作其名號于是置十二衛將軍取威名素重
者為之分關內諸府隸焉關內置府二百六十一
精兵士二十六萬舉關中之衆以臨四方又置折

衛府二百八十通給舊府六百三十三河東道府
額亞于關中河北之地人多壯勇故不置府其諸
道亦置

季本禮疑圖今按唐之諸衛環衛京師以隸外府
之兵而十道諸州則分列州鎮謂之折衝章氏所
謂府兵雖散在諸道然折衝都尉並遥隸于諸衛
是也折衝府雖各在外治兵而官實內任故百官
志係于諸衛之後不列于外官之中欲使聯屬于

內焉蓋其職與漢都尉同但不似都尉之為外任
官耳上府千二百人中府千人下府八百人蓋所
選材力之士而以折衝府統之使得專隸如漢之
材官騎士統於都尉而課都試也季冬率屬教戰
正指都試非謂練卒歲止一次而已如此則兵皆
常練無不可用之人矣故二十為兵六十而免中
間四十年既隸戎籍所業在兵時或散罷就田可
以不廢生理故志謂府兵之置居無事時耕于野

得寓兵於農之大意焉折衝府數會要與陸贄杜牧之說多寡不同意者各據一時所見或所傳聞異詞耳今姑以唐志為正凡十道置府六百三十四而關內六百二十一皆以隸諸衛也其隸諸衛也左右衛皆領六十府諸衛領五十至四十餘則隸東宮六率李泌以為東宮六率領六至三蓋十二衛者天子之宿衛也東宮有左右率府擬左右衛司禦率府擬左右領軍衛左右清道率府擬左

右金吾衛則太子之宿衛也以此分配則盡六百
三十四府而分隸於十二衛與東宮六率矣太子
六衛理不可虛以兵分衛則可以府分隸則不可
故章氏曰太子管軍非古制也然太子所隸之兵
亦必止於其所當番上之府耳其餘固皆隸于十
二衛也章氏以為唐置十六衛外統關內天下諸
府番上宿衛者是不知監門千牛四衛不與于領
番上之兵也考之六典十二衛與六率分隸之兵

共隸三百一十九府而左右衛止共領五十府領
軍衛六十府其餘或五十府四十九府六率不過
五府三府此與唐志李泌所傳之數雖有不同而
大畧不甚相遠矣然府各有名著為定額似以二
千里上下之府歲立常番而十道之中如劔南嶺
南所極之地不止二千里外者亦當在番上之列
矣雖番分十二十二月之內始一月上勢必有所
不及此不過寓控制遠方之術而已于政未為盡

便也又十道總立六百三十四府而關內一道獨
得二百六十一府其餘九道僅總得三百七十三
府要之近地府密遠地府疎詳內畧外亦恐地遠
則勢有所難行歟然而地近則役煩亦可想見矣
天下之府凡六百三十四李泌以為通計六十八
萬人而以約番上十二衛及東宮六率如前六典
所分三百一十九府約得三十一萬九千人則宿
衛之兵當天下府兵之半分為數番每月更上以

欽定四庫全書

卷五十五

後日張說募兵之數約之則京師常有十二萬人足備天子六軍正副之數而番下者亦足以為州府居守之資此居重馭輕亦治兵之善術也至其有事調發雖當遠府而所隸之衛皆得與聞焉否則何取于以府隸衛哉故典要云折衝府每歲十一月以衛士帳上于兵部以俟征發天下衛士六十餘萬六十餘萬云者其即李泌六十八萬之數歟以六十餘萬之衆而通謂之衛士可見其皆隸

於十二衛矣然兵部者本兵之任也故徵發之數
給番之差總制焉又以見十二衛之有所統矣其
應番之府而兵先調發則必有代之給番者且二
千里內外有衆六十餘萬更番之兵不患其寡餘
兵隸在折衝緩急自能相應故雖遠在邊陲兵威
亦足遥制觀李泌曰府兵分隸京師諸衛有寇則
以符契發付邊將無寇分番宿衛蓋言邊地在京
西而當二千里內外者所發之兵固亦應番宿衛

之士然亦可見府兵初行但有征調而無久戍矣
因調兵而成久戍之例因久戍而淹更番之期府
兵之困蓋由於此其法安得而不壞哉

謹案唐之折衝府散在諸道而內領于十六衛
關內諸府既如今八旗勁旅拱護京師則諸道
折衝府實與今各省駐防相近然考資治通鑑
稱德宗貞元二年上與李泌議復府兵泌因為
上厯叙府兵自西魏以來興廢之由且言府兵

平日皆安居田畝每府有折衝領之折衝以農隙教習戰陣國家有事徵發則以符契下其州

及府

胡三省注府者折衝果毅府

叅驂發之至所期處將帥

按閱有教習不精者罪其折衝甚者罪及刺史軍還則賜勛加賞便道罷之行者近不踰時遠不經歲高宗以劉仁軌為洮河鎮守使以圖吐蕃於是始有久戍之役云云是仍然征調往來不及我

朝駐防之制可經諸久遠也又舊唐書職官志稱
至德後大郡要害之地置防禦使以治軍事其
名與今防禦同然唐之防禦使實如今之兵備
道職掌迴不相侔故不列於表

五季

未置

宋

李燾續通鑑長編凡禁軍之最親近者執戟殿
陛宿衛宮省扈從乘輿號諸班直非諸班直於御

前忠佐軍頭司皇城司驤院餘軍皆以守京師
備征戍而出戍邊或諸州更戍者謂之屯駐非戍
諸州而隸於總管者謂之駐泊非屯駐駐泊而
以糴賤留便廩給謂之就糧

武經總要定州路置本路駐泊馬步軍都部署以
下兵官所統定保深祁廣信安肅順安永寧八州
軍順安軍令置真定府路駐泊馬步軍都部署以
下兵官統真定府磁相邢趙洺六州

文獻通考自唐中葉後營兵在諸鎮每防秋征行
大則節將自往小則列校董之禁衛雖設而皆非
精練然屯營之處頗雜耕戰五代以來亦有近藩
之地更迭戍守者太祖太宗懲累朝藩鎮跋扈盡
收兵於京師其邊防外藩須兵屯守者自京而遣
故有駐防屯泊之名其京畿諸州便運路者則有
就糧兵焉許挈家屬以往及本州兵皆更迭屯駐
代還始復舊所

柯維騏宋史新編職官志總管鈐轄司掌總治軍
旅屯戍營防守禦之政令都總管以節度使充副
總管以觀察以下充舊相重臣亦為都總管有禁
兵駐泊其地者以駐泊寇之若鈐轄舊以朝官及
諸司使以上充官卑資淺則去都字

宋史職官志路分都監掌本路禁旅屯戍邊防訓
練之政令以肅清所部州府以上都監皆掌其本
城屯駐兵甲訓練差使之事資淺者為監押

王安石馬正惠公神道碑移鄜延路駐泊兵馬都
總管兼知延州蜀人於公去皆環以泣公至延州
羌方以兵覲邊會上元開門張燈視以無為而羌
不能為寇

禮疑圖駐泊屯駐皆自禁軍而遣然禁軍之中惟
上軍為重故其賜犒時厚軍頭司所掌者駐泊則
駐泊重於屯駐而應駐泊者大抵皆上軍也故軍
頭司引對焉就糧而代戍者亦禁軍也則與中下

軍皆在屯駐之列而不必軍頭司引對矣然太祖時就糧亦有駐泊者豈預於駐泊者即得為上軍乎廂軍而屯者常在本州亦謂之屯駐禁軍廂軍皆有指揮其在屯所則總管鈐轄都監監押各隨所部而統之兵志載熙寧三年詔所謂上番軍或就糧軍為戍當遣者並隸總管司即其制也

謹案陳傅良謂宋初天下元無禁兵所謂禁兵者皆三司之卒分屯而更戍是以有屯駐駐泊

之名而鈐轄都監監押之官所部領者也其三
邊之兵間因事宜升為禁軍則所謂四十四處
禁軍是已自元昊叛而西北有保毅王倫叛而
東南有宣毅於是列郡稍置禁軍嘉祐中詔東
南帥司各置威果凡二十五指揮熙寧按天下
廂軍之籍而立教閱之法其後以廂軍團併為
額則兩浙崇節福建保節之類是也教閱之兵
因別為額而隸之將下則兩浙雄節福建廣節

之類是也元豐兵令悉以雄節之屬升同禁軍而禁軍始徧天下然則鈐轄總管當如今駐防將軍之比都監監押當如今城守尉防守尉之比以其為統領禁軍而設故已見提督總兵表內而仍互見於此

宋史職官志諸軍都統制副都統制統制統領建炎初置御營司擢王淵為都統制紹興十一年三大將兵罷諸軍皆冠以御前二字擢其偏裨為御

前統領官以統制御前軍馬入銜秩高者為御前
諸軍都統制且令仍舊駐劄以屯駐州名冠軍額
之上其後興元江陵建康鎮江府興金鄆江池州
及平江許浦水軍皆除都統制官卑者稱副都統
制又有統制同統制副統制統領同統領副統領
王應麟玉海建炎元年五月以河北兵為御營五
軍三年四月又更置御前五軍而劉光世所領西
兵則謂之巡衛軍在五軍之外是歲又改為神武

軍紹興元年十二月又改為行營四護軍十一年
四月三宣撫司罷乙未乃改其部曲稱某州駐劄
御前諸軍

謹案宋所設都統制皆一時權宜不為經常之
制然其結銜帶御前之名而仍以屯駐州名冠
軍額之上則與今之八旗駐防都統頗亦相近
故已見提督等篇而亦互見於此

遼

遼史兵衛志衆部族軍衆部族分隸南北府守衛

四邊各有司存具如左北府凡二十九部侍從宮

帳奚王府部鎮南境五院部六院部東北路招討

司烏威

蒙古語樹林也原作烏隗今改

部東北路統軍司約囉

滿洲

語响箭也原作遙里今改正

部伯特

滿洲語無能也原作伯德今改

部教拉

蒙古

語山也原作與里今改

部南冠部北冠部圖嚕

滿洲語腰刀繫也原作圖

盧今改

部珠展

蒙古語厚也原作朱者今改

達嚕噶

解見戶部篇

部河

西部西北路招討司圖魯卜

蒙古語模樣也原作突里不今改

部

阿雅

索倫語好也原作與衍今改

女直部室韋部西南路招討司

納喇

人名係蒙古語日也原作湟刺今從八旗姓氏通譜改正

部烏庫哩

人名係索

倫語斗也原作烏古刺今從八旗姓氏通譜改正

部納喇永安

滿洲語沙子也原作

越兀今改

部默古斯

蒙古語寡少之寡也原作梅古悉今改

部吉達

滿洲語鎗

也原作頤的今改

部鷲奇特

原作匪訖今從八旗姓氏通譜改正

唐古部哈

喇

蒙古語黑色也原作鶴刺今改

唐古部黃龍府都署司烏延

滿洲

語柔軟也原作隗衍今改

突厥部與衍突厥部北唐古部五國

部烏爾古

蒙古語孳生也原作烏古今改

迪里

索倫語頭也原作敵烈今改

統

軍司達魯

蒙古語琵琶骨也原作迭魯今改

迪里部威烏爾

唐古特語

中氣也原作隗烏古今改

部北敵烈部南府凡一十六部鎮駐

西南境伊實

解見八旗都統篇

部西南路招討司丕勒

解見

八旗都統篇

部達勒達

滿洲語遮蔽也原作迭達今改

達喇

解見盛京將軍等

官篇部丕勒

解見八旗都統篇

達嚕噶

解見戶部篇

部伊勒敦

滿洲

語順便也原作乙典今改

女直部西北路招討司卓特

解見八旗都統

篇部東北路統軍司塔瑪布古德

原作鼻古德今改

部東

北路女直兵馬司伊實阿爾威

蒙古語阿爾花紋也威樹林也原作

與隗今改部東京部署司卓特阿爾威部揚珠唐古時語

儀表也原作竊瓜今改部刷解見八旗都統篇部哈準滿洲語犁刀也原作易木

今改部戊倒塌嶺鄂博庫滿洲語沐盆也原作訛俟括今改部屯駐

木胡薩拉噶蒙古語樹枝也原作撒里葛今改部南唐古部色克

圖滿洲語小兒聰慧也今從八旗姓氏通譜人名改正部

遼史百官志北面軍官遼官帳部族京州屬國各自為軍體統相承分數迭然考其可知者如左大將軍府各統所治軍之政令大將軍上將軍將軍

小將軍諸路兵馬統署司諸路兵馬都統署諸路
兵馬副統署

謹案遼宮帳部族兵分部叅列各以其地為部
名亦令直省駐防之所由昉其將有大將軍都
統署以下諸官稱號均復相近唯遼分置于北
面而未嘗遍於南面諸州為少異耳

金

金史兵志金興用兵如神無敵當世俗本驚動人

多沈雄兄弟子姓才皆良將部落保伍技皆銳兵

及其得志中國乃以明安穆昆

鮮見八旗都統篇

叅居漢

地迨國勢浸盛罷遼東渤海漢人之襲明安穆昆者漸以兵柄歸其內族然樞府簽軍兼采漢制伐宋之役叅用漢軍及諸部族而統以國人

謹案金始制以三百戶為穆昆穆昆十為明安繼而諸部來降率用明安穆昆之名以授其首領而部伍其人至海陵天德二年省并中京東

京等路諸節鎮及明安穆昆貞元遷都復徙上
京路諸明安處之中都及山東北平河間大定
間又遷山東東路八穆昆處之河間又多易置
河北山東所屯之舊皆授田給牛使之耕食以
蕃衛京國乃大重其權授諸王以明安之號蓋
諸明安統率所部散處各路與今各省駐防之
制頗為相近而其以契丹漢人及渤海軍奚軍
俱設明安亦有似今蒙古漢軍並列八旗之制

也至諸明安穆昆其品秩職掌已詳八旗都統
篇此不複舉

元

元史兵志世祖混一海內命宗王將兵鎮邊徼襟
喉之地而河洛山東據天下腹心則以蒙古特默
齊解見八旗
都統篇軍列大府以屯之淮江以南地盡南
海則名藩列郡又各以漢軍及親附等戍焉

謹案元於各路立萬戶府各縣立千戶所各道

以宣慰司元帥總之其所統蒙古軍皆國人而特默齊軍則諸部族也其後各處鎮守頗多移徙而所謂蒙古軍特默齊軍者亦無一定之籍矣

明


明史兵志太祖為吳王罷元帥總管萬戶諸官號而覈其所部兵五千人為指揮千人為千戶百人為百戶三十人為總旗十人為小旗天下既定度

要害地係一郡者設所連郡者設衛大率五千六百人為衛千一百二十人為千戶所百十有二人為百戶所所設總旗二小旗十大小聯比以成軍十三年改大都督府為五分統諸軍司衛所二十六
年定天下都司衛所共計都司十有七留守司一
內外衛三百二十九守禦千戶所六十五及成祖
在位二十餘年多所增改其後措置不一

謹案明各衛所之兵有從征有歸附有謫發其

從征者係諸將所部兵既定其地因以留戍頗
與今駐防之制相近而諸軍司衛所統於五軍
都督府征調則統於諸將事平則散歸各衛亦
猶存唐府兵遺意然各都指揮使多由世襲無
所別擇軍職冒濫為世所輕其後五軍府如贅
疣弁帥如走卒衛所軍士隱名虛冒至舉天下
之兵不足以任戰守明政不綱莫此為甚迨我
國家立駐防之制內承

天府之營衛外鞏列服之藩維生養訓練屹如金
湯始一變明季諸衛之陋習洵足以昭一統之
業而奠億載之基者矣



欽定歷代職官表卷五十五

欽定四庫全書

史部

欽定歷代職官表卷五十六

給事中_臣劉芬覆勘

纂修兼校勘翰林院編修_臣馮集梧

膳錄監生_臣范沅

提督

國朝官制

提督軍務總兵官

從一品

直隸一人山東一人

以巡撫兼

山西

一人

以巡撫兼

河南一人

以巡撫兼

江南一人江西一人

以巡撫兼

福

建二人浙江一人湖廣一人四川一人陝西一人甘肅

二人廣東一人廣西一人雲南一人貴州一人

掌統轄本標官兵及分防營汛節制各鎮閱軍實

修武備課其殿最以聽于總督直隸提督駐古北

口節制馬蘭泰寧宣化天津正定五鎮本標四營
山東提督駐濟南府節制兗州登州二鎮本標二
營山西提督駐太原府節制太原大同二鎮本標
二營河南提督駐開封府節制河北南陽二鎮本
標二營江南水陸提督駐松江府節制崇明狼山
壽春三鎮本標五營江西提督駐南昌府節制南
昌贛州二鎮本標二營福建水師提督駐廈門節
制金門海壇南澳臺灣四鎮本標五營陸路提督

駐泉州府節制福寧汀州建寧漳州四鎮本標五
營浙江水師提督駐寧波府節制黃巖定海溫州
處州衢州五鎮本標五營湖廣水陸提督駐常德
府節制襄陽宜昌鎮夔永州四鎮本標四營四川
提督駐成都府節制川北重慶建昌松潘四鎮本
標五營陝西提督駐固原州節制延綏興漢河州
三鎮本標五營甘肅甘州提督駐甘州府節制西
寧寧夏涼州肅州四鎮本標五營安西提督駐

烏魯木齊迪化城本標五營廣東提督駐惠州府
節制左翼右翼碣石潮州高州瓊州南澳七鎮本
標五營廣西提督駐柳州府節制左江右江二鎮
本標五營雲南提督駐大理府節制臨元開化騰
越鶴麗昭通普洱六鎮本標五營貴州提督駐安
順府節制安籠古州鎮遠威寧四鎮本標四營初
提督帶左都督右都督銜者正一品帶都督同知
銜者從一品帶都督僉事署都督事者正二品乾

隆十八年省都督等銜定為從一品

歷代建置

謹案提督之官自有明始然不為一定之官稱
且不設員額亦不常置蓋古者天子寄軍政于
六鄉居則以田警則以戰所謂入使治之出使
長之素信者與衆相得也周之六鄉在國以比
長閭胥族師黨正鄉大夫為稱其在軍也則以
五長兩司馬卒長旅帥師帥軍將為號為兵者

皆平居之民為將者皆平居之吏故曰邊境一有事左右之官皆將帥也漢承秦制以郡都尉專司兵事而兵始有常將然都尉亦以文臣為之則兵民之事雖分而主兵者固不分文武魏晉以降督軍州者多加將軍郎將之號而當時中朝清望官亦頗以加軍號為重知將軍等號元非專為統兵而設嗣是總管節度殊名同實唐末之節度使多用武人至宋而總管鈐轄或領

以文臣而武臣實司其事蓋自有長募屯駐之
兵而始有營伍之制既有營伍即不得不置將
帥以專領之然其初偏裨以下雖漸漸專用武
臣而大帥則仍多以地方官兼之自宋都副總
管文武並置元置元帥萬戶等府則守臣不復
得與兵事而文與武始截然為二矣夫司馬世
官亦以命氏後世兵皆常聚師多世守文武之
途既分而緩帶輕裘者或不嫻行陣即如宋

崇寧中以湯景仁等提舉各路弓箭手後仍改
用武臣則以前所置文臣不能親詣邊塞衝冒
寒暑之故則省會內地邊陲要區屯兵以衛民
生立將以統營伍實亦因時之政矣第明制提
督既不常設而自總兵以下凡統兵之官亦俱
無品級無定員且多充以勛戚都督等官大率
童騃驕恣軍政紊如我

朝奄有區宇詰戎飭伍各省特設水師陸路提督

以統綠旗兵旅自畿輔海甸達于雪山炎徼星
羅碁置腹地則兼以巡撫承以總兵副將參將
游擊都司守備千總把總之屬各有員額品秩
而總督實節制之文武相維分標協理我

皇上制治保邦動關

宸慮邊防屯戍往往增設兵伍又以武臣俱有分猷
宣力之責

特命倣文臣之例量職定制各給養廉以優贍其身

家規畫尤為盡善茲故撮論其概而總兵以下其說亦畧具于此云

三代

周禮夏官凡制軍萬有二千五百人為軍軍將皆命卿

杜佑通典三代之制天子六軍其將皆命卿諸侯之制大國三軍次國二軍小國一軍其將亦命卿也

謹案軍將命卿知軍帥不特選置于六官凡六鄉之吏自卿以下德任者使兼之矣孔穎達云古者用兵天子先用六鄉六鄉不足取六遂六遂不足取公卿采邑及諸侯邦國而章如愚曰古者畿內之兵不出卒有四方之役即用諸侯人耳或遣上公率王賦亦不過元戎十乘以先啟行而已蓋盛王之制天下大則有方伯小則有連帥其待卒應變如身之使臂各適其事之

遠近苟方伯連帥所不能克然後鄉遂之士應之周官之象胥曰王之大事諸侯推此而出軍之法可知也然則諸侯之軍將其于王朝亦有似今之各省設有提督者故著此以見權輿之有自焉

國語齊語制國五家為軌十軌為里四里為連十連為鄉五鄉一帥故萬人為一軍五鄉之帥帥之三軍故有中軍之鼓有國子之鼓有高子之鼓

謹案齊作內政以寓軍令三分其國以為三軍
公將其一高國將其二將兵者已似有專官然
仍皆命卿為之則固用周制也春秋時列國之
命將惟齊魯晉楚畧可考見魯之戰于鞏也四
卿並出迨作三軍而三桓各將其一舍中軍而
季氏專將一軍仲叔各專一軍之半猶是軍將
皆卿也晉始作二軍上軍公自將下軍太子將
之閔二年伐東山臯落氏則太子將上軍罕夷

將下軍僖十五年韓之戰亦是公將上軍韓簡
為下軍將據此則僖八年里克帥師其御右同
韓簡當亦是下軍將知晉初上下二軍無定將
矣楚亦為三軍其軍將出於臨時擇人城濮之
役子玉以令尹將中軍子西以司馬將左邲之
役沈尹將中軍而令尹孫叔敖不為軍帥鄢陵
之役則子反以司馬將中軍子重以令尹將左
軍皆無一定之制其後齊景公召司馬穰苴以

為將軍將兵扞燕而將兵者始有特設之官然
事已則罷不為定制逮乎戰國趙李牧為北邊
良將常居代雁門以備北寇此當為後世大將
備邊之所自始爾

春秋左氏傳吳徐承等率舟師自海入齊

謹案江漢湯湯武夫洸洸此水戰之始嗣後吳
楚交戰率用舟師越亦有習流之士越王句踐
嘗命范蠡舌庸率師沿海沂淮以絕吳路而徐

承之率舟師入海當亦為今水師提督所自昉

歟

秦

漢書百官公卿表郡尉秦官掌佐守典武職甲卒

謹案唐李賢云秦每郡有尉一人今以漢書地

里志考之殆未必然樊噲傳噲攻圍都尉劉攽

曰圉縣名有尉無都尉又郡都尉至景帝方加

蓋衍一都字然沛公為漢王酈商以將軍為隴

西都尉高后功臣表有醴陵侯越為河內都尉
豈秦固已有都尉而史不具歟又馬端臨曰秦
并天下列為三十六郡郡置材官蓋刑法志云
漢興踵秦而置材官于郡國則郡置材官固秦
法也且不惟材官而已秦騎士李必駱甲見漢
書灌嬰傳則秦亦有騎士漢嚴安曰秦使尉屠
將樓船之士攻越則秦又有樓船漢材官騎士
樓船屬郡都尉即秦郡尉之所職可知矣

漢

漢書百官公卿表諸侯王國中尉掌武職如郡都尉郡尉秩比二千石有丞秩六百石景帝中二年更名都尉

後漢書百官志武帝又置三輔都尉各一人譏出入邊郡

謹案漢郡國凡百有三置郡尉者九十山西自三輔而外郡纔十有三而置都尉三十其餘郡

國乃八十有七置都尉者止六十其不置者蓋四十有三也尉與守皆二千石其尊與守等酷吏傳言周陽由為守視都尉如今為都尉陵太守奪之治武帝欲以甯成為郡守公孫宏言成為濟南都尉其治如狼牧羊不可令治民明守與尉之各有分治矣然王應麟引漢儀注云邊郡置都尉不治民然則都尉非邊郡當亦治民至若吾邱壽王為東郡都尉帝以壽王故不復

置太守其賜之璽書所謂連十餘城之守任四千石之重者以兼守尉之任也又翟義為南陽都尉行太守事行縣至宛以事按宛令威震南陽知漢時都尉蓋不特典軍而亦有兼行太守之事者夫漢之太守專制方面幾與今之巡撫等則其兼守尉之任者乃正如今以巡撫兼提督之比也

錢文子補漢兵志材官騎士屬郡都尉以歲八月

太守都尉令長丞為會都試水處為樓船令丞尉亦各統其縣守尉不得專也大抵金城天水隴西安定北地河東上黨上郡多騎士三河潁川沛郡淮陽汝南巴蜀多材官江淮以南多樓船士

謹案漢刑法志曰武帝平百粵內增七校外有樓船皆歲時講肄其實高祖已有樓船之制漢官儀云高祖命天下郡國選能引鬪蹶張材力武猛者以為輕車騎士材官樓船常以立秋後

講肄課試各有員數平地用車騎山阻用材官
水泉用樓船此皆調民為兵非有常置之額而
歲時講肄及有事調發則皆都尉主之他如惠
帝七年發車騎材官詣滎陽太尉灌嬰將文帝
三年發中尉材官屬衛將軍軍長安景帝中元
三年秋中尉不害將車騎材官士屯代高柳武帝
元光二年太中大夫李息為材官將軍將三十
萬衆屯馬邑谷中六年韓安國為材官將軍屯

軍於漁陽此則徵京輔郡國之兵而特遣大臣
以為軍將故領材官士者則曰材官將軍領車
士騎士者曰車騎將軍領樓船士者曰樓船將
軍又有領步士則為步兵將軍皆事已即罷其
與今之提督職分殊矣

後漢書百官志中興建武六年省諸郡都尉并職
太守無都試之役惟邊郡往往置都尉及屬國都
尉稍有分縣治民比郡○王國中尉一人比二千

石職如郡都尉主盜賊

謹案漢列郡有都尉其在王國則中尉比都尉
光武所省特郡都尉而紀乃云罷郡國都尉官明
衍一國字也

宋書百官志光武省都尉後又往往置東部西部都
尉

謹案後漢省都尉後每有劇職郡臨時置都尉
事訖罷之然終建武之世已不能守前法罷尉

省校輒復臨時補置如七年罷長水射聲二校
十五年復更增屯騎校九年省關都尉十九年
復置函谷關都尉而天下亦往往復置都尉其
見于紀者和帝永元十六年復置遼東西部都
尉官安帝永初四年初置長安雍二營都尉官
順帝陽嘉二年復置隴西南部都尉官桓帝永
壽元年初置泰山琅邪都尉官而金城西部都
尉隴西南部都尉各有戍守分地益州西部都

尉及各屬國都尉俱或領城如太守則視前漢之以都尉行太守事者復加優矣

馬端臨文獻通考光武以幽冀并州兵定天下始於黎陽立營領兵騎千人以謁者監之號為黎陽兵其後又以扶風都尉部在雍縣以涼州近羌數犯三輔將兵衛護園陵故俗稱雍營

謹案司馬貞曰邊郡有屯兵後因置將屯將軍如傳寬之以代相國將屯是也若郡國之騎士

材官樓船雖各有員數然俱散在民伍迨光武
于黎陽立營則郡國兵之各立營伍實始諸此
其後明帝置度遼營其將軍遂為常守和帝置
象林兵安帝置長安雍二營及漁陽營順帝時
緣海又稍稍增兵而魏郡趙國河南等塢多置
軍屯已略似今制之分標營者則其總帥當亦
如今之提督也

三國

三國蜀志魏延列傳先主為漢中王遷治成都當得重將以鎮漢川乃拔延為督漢中鎮遠將軍領漢中太守

謹案魏延以漢中督領太守亦猶魏之以都督領刺史也

宋書百官志魏黃初二年始置都督軍州事或領刺史

南齊書百官志魏晉世州牧隆重刺史任重者為

使持節都督輕者為持節督

謹案後漢建武初征伐四方始權置督軍御史
事竟而罷建安中魏武為相始遣大將軍督之
袁紹分沮授所統諸軍為三都督魏武征孫權
還又使夏侯惇督二十六軍則都督之號始此
而

國朝初制提督兼都督銜者其名亦昉乎此也
魏初置都督類皆與州相近如揚州刺史治壽

春都督揚州諸軍事亦治壽春之類其後都督
或領刺史亦正沿漢以都尉行太守事之例與
今巡撫兼提督銜者亦略相似故與督撫表互
見焉

文獻通考黃初中復令州郡典兵州置都督尋加
四征四鎮將軍之號

謹案漢之雜號將軍皆主征伐事訖皆罷若四
征興于漢代四安起于魏初四鎮通于柔遠

東鎮

西南並後漢

四平止於撫輯

魏置

其將軍各一人

置鎮止魏置

已似為額設之官且都督或以兼治民事而四
征四鎮將軍但為典兵之號疑都督者略如今
之總督而征鎮將軍或如今之提督然如石邑
當魏世拜鎮東將軍旋代王基都督揚州諸軍
事後進征東大將軍俄遷驃騎將軍陳騫拜使
持節都督淮北諸軍事安東將軍轉都督豫州
諸軍事持節將軍如故又轉都督江南諸軍事

徙都督荊州諸軍征南大將軍事晉武受禪進
車騎將軍則諸將軍亦第為方面寵號循資
遞進而非專設以為統兵之定職矣

三國吳志蔣欽列傳欽與呂蒙持諸軍節度權襲
荊州欽督水軍入沔

謹案欽節度諸軍而復自督水軍則有似今之
水師提督者考吳統軍之帥類稱為督故有水
軍督營都督京下督江夏督諸號蓋吳之邊境

有督有監監者監諸軍事之職而督者即督諸軍之職也

晉

晉書職官志都督諸軍為上監諸軍次之督諸軍為下使持節為上持節次之假節為下○武帝置

四中郎將

東南西北

或領刺史或持節為之

謹案晉初制都督知軍事刺史治民各舉其職則猶仍漢制至惠帝末而督軍者皆兼刺史蓋

如今督撫之任並無專典兵事為武職之員但當時諸州都督類加將軍或中郎將之號則凡持節都督亦有近今之提督者矣

晉書謝元列傳拜建武將軍兗州刺史領廣陵相監江北諸軍事劉牢之列傳謝元鎮廣陵多募勁勇號為北府兵

謹案督諸軍者類兼制數州而兗州別領北府兵又似今提督節制各鎮外之有本標營兵也

宋齊梁陳

通典宋有都督諸州諸軍事舊曰監某州諸軍事
文帝即位改監為都督

謹案魏晉以來有督諸軍者有監諸軍者即如
宋文帝在晉朝以冠軍將軍加授使持節監徐
兗青冀四州諸軍徐州刺史關中既平又授監
司州豫州之淮西兗州之陳留諸軍事前將軍
司州刺史仍改授都督荆益寧雍梁秦六州豫

州之河南廣平揚州之義成松滋四郡諸軍事
西中郎將荊州刺史持節如故永熙元年進督
北秦并前七州進鎮西將軍又加進督湘州俱
為統兵之任其遷進之序亦大略可見則杜氏
所為舊曰監而文帝改為都督非也凡齊梁及
陳皆仍宋制茲不備著大抵晉宋以後督諸州
者統治兵民為今督撫之任而與提督亦復相
近故既入督撫表內而仍互見于此云

北魏

魏書樂安王範列傳拜都督五州諸軍事衛大將
軍長安鎮都大將子良襲王拜長安鎮都大將雍
州刺史和跋列傳跋子歸拜使持節冠軍將軍雍
城鎮都大將陸侯列傳拜龍驤將軍都督洛豫二
州諸軍事虎牢鎮大將轉平西將軍安定鎮大將
徵還出為平東將軍懷荒鎮大將又以侯都督秦
雍二州諸軍事平西將軍長安鎮大將

周書閔慶列傳慶祖提使持節車騎將軍燉煌鎮
都大將

謹案魏之鎮大將在諸鎮將之上太和十九年
之詔鎮大將與州刺史及品登王公者並列當
如今之提督而鎮都大將又在鎮大將之上又北
齊書王懷當魏世為大都督鎮下館堯傑以車
騎將軍出為磨城鎮大都督蓋亦鎮都大將之
比其亦如

國朝初制提督之由都督僉事而遞進為左右都督者歟又周賀拔岳當魏季以假節衛將軍左大都督與右都督侯莫陳悅並為使持節督諸軍事爾朱天光之副則天光之職正如今總督而岳之左大都督正如今提督也

北齊書斛律金傳金除大司馬高祖出軍襲山後部落以金為南道軍司任延敬列傳天平初拜侍中盧仲延叛以延敬為大都督東道軍司率都督

元整叱列陀等討之高昂列傳拜司徒公為軍司大都督統七十六都督治兵于武牢

謹案杜佑曰漢魏有軍師之官晉避景帝諱改為軍司凡諸軍皆置之以為常員即監軍之職

通鑑晉康帝紀殷浩除安西軍司穆帝紀劉惔勸會稽王昱出鎮以己為軍司胡三省注俱謂軍司即軍司馬考晉書庾翼傳殷浩徵命無所就而翼請為司馬及軍司並不赴則軍司與司馬當各為一北魏羊祉以左軍將軍持節為梁官胡說誤也

州軍司與都督西征諸軍事行梁州刺史楊椿

討叛氏薛懷吉試守恒農郡以本任為安東將軍邢巒軍司後又以益州刺史為征東將軍中山王英軍司後又為鎮東將軍盧昶軍司畢聞慰以平東將軍為都督安樂王鑒軍司慕容紹宗為西南道軍司討李延孫其討蕭淵明也杜弼為軍司而弼傳又有軍司崔鍾似為行軍而設非有常員然亦祇監軍之任若斛律金任延敬高昂則專制一道自為統兵之官此正如吳

全琮遷右大司馬左軍司之比而非如吳範所謂臣乃陛下之軍師者然金以大司馬為軍司延敬以待中為軍司昂以司徒公為軍司則正如隋唐以重臣充行軍總管之比其與今之提督又稍不同也此齊書所列然事皆在魏世故仍繫之北魏條下

北齊

北齊書暴顯列傳以顯為水軍大都督

謹案北朝之都督隨事立名自大都督外有京畿大都督京畿南面大都督防城大都督鎮城大都督諸號其崇庠亦復不一而水軍大都督則如今之水師提督也

後周

通典後周改都督諸軍事為總管則總管為都督之任

周書代王達列傳建德初出為荆淮等十四州十

防諸軍事荊州刺史杞王康列傳建德三年出為
總管利始等五州大小劍二防諸軍事利州刺史
尉遲綱列傳武成元年除涇州總管五州十一防
諸軍事涇州刺史保定二年為陝州總管七州十
三防諸軍事陝州刺史韋祐列傳子初位至開府
儀同大將軍閭韓防主魏元列傳除白超防主轉
和州刺史伏流防主

謹案北朝之制有防主有防城大都督則總管

州防軍事當即所謂防主而在防城大都督之上者矣若司馬消難入陳陳宣帝以為都督安趙九州八鎮車騎將軍此則倣北朝置之不為定例也

隋

隋書百官志州置總管者列為上中下三等總管刺史加使持節

謹案隋之總管刺史亦沿前代督軍州之舊其

後罷郡為州又罷州置郡并罷諸總管而有兵處別置都尉領兵與郡不相知其與漢制之守尉分治而以時都試者異矣

唐

新唐書百官志大都督府都督一人從二品中都督府都督一人正三品下都督府都督一人從三品掌督諸州兵馬甲械城隍鎮戍糧稟總判府事謹案唐初緣邊鎮守及襟帶之地沿隋舊制置

總管府以統軍戎至德七年改總管府為都督府其總十州者為大都督亦兼刺史而不檢校州事蓋專以典軍為職正如今之提督也

舊唐書地理志安西節度使撫寧西域統龜茲焉耆于闐疏勒四國北庭節度使防制突騎施堅昆部管瀚海天山伊吾三軍河西節度使隔斷羗戎統赤水大斗建康寧寇玉門黑離豆盧新泉等八軍張掖交城白亭三守捉朔方節度使捍禦北狄

統經畧豐安定遠西受降城東受降城安北都護
振武等七軍府河東節度使掎角朔方統天兵大
同橫野岢嵐等四軍忻代嵐三州雲中守捉范陽
節度使臨制奚契丹統經畧威武清夷靜塞恒陽
北平高陽唐興橫海等九軍平盧軍節度使鎮撫
室韋靺鞨統平盧盧龍二軍榆關守捉安東都護
府隴右節度使以備羌戎統臨洮河源白水及安人
振威武戎莫門寧塞積石鎮西等九軍綏和合川

平夷三守捉劍南節度使西抗吐蕃南撫蠻獠統
團結營及松維蓬恭雅黎姚悲等八州兵馬天寶
平戎昆明寧遠澄川南江等六軍鎮嶺南五府經
略使綏靜夷獠統經畧清海二軍桂管容管安南
邕管四經略使長樂經畧使東萊守捉東牟守捉
謹案唐分天下州縣制為諸道每道置使其邊
方有寇戎之地則加以旌節謂之節度使蓋即
古之持節都督至德以後諸道皆聚兵中原刺

史每受節度之號節度又兼領觀察諸使分理郡縣為今督撫之任而節度之號則固專為統兵設也故亦互見于此

五季

新五代史張敬達列傳清泰二年河東節度使石敬瑭兼大同彰國振武威塞等軍蕃漢馬步軍都總管屯於忻州以敬達為北面副總管以分其兵明年徙敬瑭鎮天平遂以達為大同彰國及振武威

塞等軍蕃漢馬步軍都部署

謹案後唐蕃漢都總管權寄隆重蓋前代都督
中外諸軍事之比其下有副都總管明宗嘗為
之俱非復尋常之任而北面副總管則有似今
之提督若都部署初第名為部署同光元年始
以元行欽為之本在招討使之下其後有都部
署乃為行軍主帥之任事已輒罷非定制也

宋

柯維騏宋史新編總管鈐轄司掌總治軍旅屯
戍及營防守禦之政令或一州或一路有兼兩路
三路者舊制都總管以節度使充副總管以觀察
以下充或文臣知州則管勾軍馬事舊相重臣亦
為都總管有禁兵駐泊其地者以駐泊冠之初名部
署慶厯八年改為總管若鈐轄舊以朝官及諸司
使以上充官卑資淺則去都字崇寧中置京畿四
輔郡以知州為都總管仍兼副總管鈐轄靖康中

詔四道副總管並通差文武臣建炎分置帥府以
諸路帥臣帶都督總管要郡守臣帶兵馬鈐轄要
郡帶兵馬都監並以武臣為副稱副總管副鈐轄
副都監許便宜行軍馬事辟置僚屬依帥臣法遇
起兵則副總管為帥副鈐轄都監各以兵從聽節
制

謹案宋初懲五季之弊召諸鎮節度使留之京
師分命朝臣出守列郡號權知軍州事軍謂兵

事州謂民事也其後文武官參為知州軍事故
諸知府州軍監有兼留守司公事者有兼經畧
安撫使馬步軍都總管者有兼安撫使馬步軍
都總管者有兼安撫使兵馬鈐轄者有兼安撫
使兵馬巡檢者其餘大藩府或沿邊州郡及當
一道衝要者並兼兵馬鈐轄巡檢或帶沿邊安
撫提轄兵甲沿邊溪峒都巡檢蓋亦猶前代督
軍州之例則都總管者正如今巡撫兼提督之

比而副總管亦如今提督之比也

王應麟玉海都統駐劄之地沔州興元金州江陵
鄂州池州江州鎮江建康平江許浦水軍又利州
有副都統制

謹案都統二字始見晉書庾亮傳而都統之官
始於苻秦之少年都統唐之都統或總五道或
總三道又有行營都統副都統一時兵興稱謂
不一宋初有馬步軍副總管遇出師征討則加

以都統制軍馬之名以總統諸將然不為官稱
建炎置御營司擢王淵為都統制名官自此始
紹興十一年罷諸將兵乃收其所部為御前諸
軍而統制皆以屯駐州名冠軍額之上自是天
下有十都統恩數略視三衙權任在帥臣之右
初以秩卑者稱副都統制乾道中增制副都統
制一人兼領軍事其後都副鮮並除者則凡屯
劄之都統制副都統制亦正如今提督之比也又

平江許浦水軍太明州定海水軍舊隸沿海制
置使防捍海道乾道八年併歸許浦鎮置副都
統制統之則其副都統制固如今之水師提督
矣

遼

遼史百官志南面軍官諸軍兵馬都總管府某兵
馬都總管聖宗太平四年見兵馬都總管兵馬都
總管府歸聖軍兵馬都總管府南面邊防官五州

都總管府耶律蘇色

滿洲語捺草也原作速撒今改

穆宗應歷初

為義霸祥順聖五州都總管山後五州都管司聖

宗統和四年見普弩寧

原作蒲奴寧从字面改正

為山後五州

都管

謹案遼都總官之職北面有東路兵馬都總管府

其官曰東路兵馬都總管南面五京各有都總

管府官曰某京都總管知某府事又有南京兵

馬都總管府其諸府都總管蓋皆如今提督之

任也

金

金史百官志諸總管府

謂府尹兼領者

都總管一員正三

品掌統諸城隍兵馬甲仗總判府事同知都總管

一員從四品掌通判府事惟博索

滿洲語山陰也原作婆速今改

路同知都總管兼來遠軍事兵馬副都總管一員

正五品所掌與同知同○統軍司

河南山東陝西益都

使一

員正三品督領軍馬鎮攝封陞副統軍一員正四

品判官一員從五品知事一員從七品知法二員
從八品

謹案金天會六年伐宋畢詔遣西南西北二帥
以鎮方面而諸路各設兵馬都總管府天德二
年改諸京兵馬都部署司為本路總管府又以
博索路統軍司為總管府若正隆六年置三十
二總管則如前代行軍總管之比而非諸都總
管之例也

元

元史百官志宣慰使司都元帥府秩從二品使三

員同知二員副使二員經歷二員知事二員都元

帥府都元帥二員副元帥二員經歷知事各一員

元帥府秩正三品達魯噶齊

解見戶部篇

一員元帥一

員經歷知事各一員

謹案元初於北庭察遜塔拉

蒙古語察遜雪也塔拉曠野也原作

曲先塔林今改

蒙古軍征東等四處立都元帥府置都

元帥副元帥副元帥之下又有同知副元帥其
宣慰司有邊陲軍旅之事則兼都元帥若世祖
至元二十九年以汪惟和為鞏昌二十四處都
總帥亦元帥之職也元又立諸路萬戶府管軍
七千以上為上萬戶府達魯噶齊一員萬戶一
員俱正三品副萬戶一員從三品管軍五千以
上為中萬戶府達魯噶齊萬戶各一員俱從三品
副萬戶一員正四品管軍三千以上為下萬戶

府達嚕噶齊萬戶各一員俱從三品

以上中遞降例之疑

當為正四品

副萬戶一員從四品其官皆世襲有功

則陞之與元帥府官又復不同也

明

明史百官志都指揮使司都指揮使一人正二品
又都指揮同知二人從二品都指揮僉事四人正
三品其屬經歷司經歷正六品都事正七品斷事
司斷事正六品副斷事正七品吏目各一人司獄

司司獄從九品倉庫草場大使副使各一人行都
指揮使司設官與都指揮使司同都司掌一方之
軍政各率其衛所以隸于五府而聽于兵部凡都
司並流官或得世官都指揮使及同知僉事常以一
人統司事曰掌印一人練兵一人屯田曰僉書巡
補軍器漕運京操備禦諸雜務並選充之否則曰
帶俸明初置各行省行都督府設官如都督府又
置各都衛指揮使司洪武四年置各都衛斷事司

以理軍官軍人詞訟又以都衛節制方面職係甚重從朝廷選擇陞調不許世襲八年詔各都衛並改為都指揮使司凡改設都司十有三燕山都衛為北平都司西安都衛為陝西都司太原都衛為山西都司杭州都衛為浙江都司江西都衛為江西都司青州都衛為山東都司成都司衛為四川都司福州都衛為福建都司武昌都衛為湖廣都司廣東都衛為廣東都司廣西都尉為廣西都司

定遼都衛為遼東都司河南都衛為河南都司行
都司三西安行都衛為陝西行都司大同都衛為
山西行都司建寧都衛為福建行都司十五年增
置貴州雲南二都司後以北平都司為北平行都
司永樂元年改為大寧都司宣德中增置萬金都
司計天下都司凡十有六又于建昌置四川行都
司於鄖陽置湖廣行都司計天下行都司凡五
謹案明自罷中書行省設都布按三司分治兵

刑錢穀都司序銜在布按二司上則都司實為一方武職重臣正如今提督之比又明初於各行省置都鎮撫司設官有都鎮撫副鎮撫知事之屬洪武六年罷附著於此

明史李如松列傳萬厯十二年為提督陝西軍務總兵官武臣有提督自如松始也已命盡統遼東宣府大同諸道援軍如松以權任既重不欲受總督制事輒專行兵科許宏綱等以為非制尚書石

星亦言如松勅書受督臣節制不得自專乃下詔
申飭麻貴列傳起貴備倭總兵官已加提督盡統
南北諸軍

謹案明京營設有提督自內臣外並用文臣武
臣南京有提督操江多領以勛戚若各處巡撫
多兼提督軍務則以文臣為之其總兵間有稱
提督者如鎮守昌平舊有提督武臣嘉靖三十
八年改為鎮守總兵聽總督節制鎮守貴州總

兵嘉靖三十二年加提督麻陽等處地方職銜
又嘉靖三十七年添設提督狼山鎮副總兵究
其職守則仍與諸鎮守總兵副總兵同至李如
松為提督而提督始為專設之官然而事權既
重不循體制見督師不肯甲冑庭謁用監司謁
督撫儀至其弟如楨出鎮遼東遂欲與總督講
鈞禮明代重文輕武而其末流至於如此則其
紀綱不立亦可概見也我

朝定制大小相維提督一官既以節制諸鎮而仍受節制于總督其

簡用多拔尤于各鎮之中課功稽績量材掄擇所以表率營伍鞏護疆陲非往代所可幾及也

欽定歷代職官表卷五十六